



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

Instagram tiryimiyim@aolima

YouTube tir yimiyim

TAPAK 8



China-i rakzükba li India-i kodang meyipa angutsü ?

Honduras tir inyaksü Xiomara Castro shimogo



VOL. XIX NO. 106 (ADOK 106) DIMAPUR KÜPTOKNÜ (SATURDAY)

AENJETI (JANUARY) 29, 2022

₹ 5.00

NeoCov Coronavirus junga bushidangtsü: WHO

New Delhi, January 28, 2022 (Agencies): Chinese scientist temi bushitetba NeoCov coronavirus jungjunga bushidangtsü nungdaker ta World Health Organisation (WHO)-i Hokolbarnü metetdaksüogö.

Wuhan researchers telok kati South Africa indang lah nung NeoCov ta ser coronavirus tapu tasen ka bushitetba osang metetdaksü. Tarutsü nung iba virus ajanga meimchir nem lendong tulu bentsür arutsü ana nung dang lir ta Wuhan researchers-ashi.

Coronavirus ta asüba ya virus kibong tulu ka lir aser iba virus ajanga yimra nungi Severe Acute Respiratory Syndrome (SARS) tashi tashidak balala adokdaksür.

"Parnoki study asüba nung bushitetba virus ajanga meimchir nem lendong bentsür

arutsü asü masü'ar jungjunga bushiteptsüla" ta WHO-i ashi.

"Meimchir dak menatepba tashidak 75% shi ka shirurutem ajanga adokdaksür. Coronavirus ya aiben lah dena shirurutem dak angur. Onoki zoonotic viruses azüoktsü atema mapa inyaker" ta WHO-isa metetdaksü.

WHO-isa Chinese researchers dang iba osang lemsatepba atema pelaba metetdaksü.

NeoCov yagi COVID-19 virus ama human cells telungi iteter. Meimchir asoshi lendong bentsür arutsü atema NeoCov ya joko mutation kati pilar lir" ta Chinese researchers-i metetdakja liasü.

Iba virus ya Middle East Respiratory Syndrome (MERS) den sendaktepa lir. Iba tashidak ya mezüing 2012 küm Saudi Arabia nung jangjateta liasü.

Teni agi menemba Covid booster tendangtsü

New Delhi, January 28, 2022 (Agencies): Drugs Controller General of India (DCGI)-i Bharat Biotech nem intranasal Covid booster dose tendangtsü temelaba agütsüogö.

Teni agi menemba Covid booster dose ya nisung 900 dak tendangtsü.

Bharat Biotech-i intranasal Covid vaccine atema 'phase-III booster dose study' asütsü indang Subject Expert Committee (SEC)-i ashi.

India nung COVID vaccine indang tasembuba tendangtsü atema Bharat Biotech ya company tanabuba lir. Teni agi menemba vaccine ajanga Omicron amala Covid-19 variants menatepba noktangtsü

tashi lir. India nung Covidshield, Covaxin aser Sputnik V vaccine amshitsü molunga agizükogö.

Hokolbarnü India nung nisung 2,51,209 dak COVID-19 putet aser parnok züingsema nisung crore 4,06,22,709 kümogö ta Union Health Ministry-i metetdaksü.

Taoba ghonda 24 tsüingda COVID-19 agi nisung 627 asü aser parnok züingsema tasür ajak agi 4,92,327 kümogö.

Tang nisung 21,05,611 anepaludar aser nisung 3,80,24,771 taneptsü nguogö, ta ministry-isa ashi.

Tang tashi nung India nung Covid vaccine indang dose crore 164.44 agütsüogö.

UPSC candidates atema tanü webinar ka alitsü

New Delhi, January 28, 2022 (Agencies): Helping Hands-i January 29, 2022 nü Mega IAS Scholarship Exam, 2022 nung takok angurtem asoshi webinar ka ayonga agitsü.

January 29, 2022 nikongdang 5:00 ako nung iba webinar ya Google Meet ajanga agitsü. Iba mapang teshimtet nisungtemi parnoki ajangshia aruba otsütem, takok angutsü atema lenmangtem aser tanga

osangtem lemsateptsü.

Shisalen sayurtem: Manish Gautam, Chief Executive Director, ALS,

Robin Hibu, IPS, Special Commissioner of Police, Delhi Police,

Prince Dhawan, IAS Special Commissioner (Trade & Taxes), GNCT Delhi,

Padi Tatung, IRS, Joint Commissioner of Income Tax.

Google Meet link: <https://meet.google.com/pjx-vbrh-tq>

Oting: Army-ia Amit Shah ama maitüsü aibelenä khasetba kuli agütsür

Mumbai, January 28, 2022 (Agencies): Assam nung amenoka aliba 21 Para Special Force sepaitemi Nagaland kübok Mon district nung civilian 13 tepsetba sülen anogo ana lir Union home minister Amit Shah-i Parliament nung maitüsü aibelenä ajanga iba ya atalok ta shia liasü.

Amit Shah-i iba olen jembiba ya nisungtemi ashishitep aser tai maketeritem tepsetba miimbangtsü merangba mapa ka ta aitsü.

Ajisüaka, Amit Shah-i iba olen jembiba sülen ita ka shi süir Indian Army-ia kasa olen ashir.

Iba ken o atema sepai 37-i Special Investigation Team (SIT) tsüingdang langzüdang 'parnoki anguba intelligence osang tai liasü aser iba jagi nisung 13 tepset' ta ashiba angazüköer.

Army 37 rongnung nisung 31 tashi iba tatalokba nung shilem agirtem lir. SIT-isa civilian 85 dang asüingdangyaogö aser parnok rongnungi nisung 2-i kuli agütsüba kanga tongtipang ta SIT-i bilemer.

Iba lendong matalokdang tesüiba itatem kasa intelligence osangtem agütsüba atema Army-i mapa kecha meinyaki dang toktsü, aji asü nung December 4 nü parnoki nem sangoktsüba intelligence osang nung kechiba temolung agüja inyak ta asüba tasüingdangbatem arur.

December 4 nü intelligence

osangji Nagaland police, IB, military agency aser tanga agencies kar nungi angu ta SIT-i bushitetogö aser iba jagi osangtemji jangjashitsü meranger.

Iba anogo Army telok jagi Tiru valley nung mendanga ata lia pickup van gari ka nung yimdaklir 8 aruba angu, anungji ibaji ajungbena ajuruba lendong ka masü ta police ketdangtsür kati ashi.

Yimdaklir ajakji Konyak nung liasü aser parnok nakmati atudak ka nung aayangertem liasü aser parnok dak odang injang khaloktsü. Iba ya nikongdang 4:00 ako tera süir sangwa lia atalok. Army ketdangtsürtemibo yimdaklirtem dak prangpong mesükba bena aliba angu ta ashir, ta police ketdangtsürisa metetdaksü.

Iba nung nisung 6 khaset aser ana yirutsü aser parnok shingai prangpong bena maliasü.

Nikongdang 4:00 ako meta yimdaklirtem khaset saka sepaitemi aonung 9:00 ako tashi iba tesem nung liasü. Armed forces-i iba tesem nung ghonda 5 tashi kazüba nung tasüingdangba adoker.

Aonung 9:00 ako meta yimdaklirtemi iba tesemi aodang tasüingdangtemji tarpaulin agi meibanger aliba angu. Sepaitem jagi tasüingdangtemji parnok tesepepi bener aotsü merang asütsü akok aser iba jagi yimdaklirtem ain

adokdaksü aser parnok tejashi nung army garitem nung mi senoktsü ta police ketdangtsürisa ashi.

Idangji army-i yimdaklirtem dak injang khaloktsü aser aonung 9:00 ako süir ano nisung 9 tashi khaset.

Army-i mezüing yongi injang amshitsü temeten lir asü? mesüra parnoki ashiba amaji civilian temji telungpurtem ta maitüsü aibelen nunga tepsettsü atema injang khaloktsütsü koka lir asü? ta SIT-isa bushisüingdangba osang angazükogö.

SIT-i civilian 13 tepsetba nung rangloker bushisüingdang. Külen, army ketdangtsürtemia parnoki tazüokba lia inyak aser yirua aliba civilian ana metepset aser anepalutsü atema Assam-i anir ao ta ashir.

21 Para Special Force ya 2015 küm Myanmar "surgical strike" nung shilem agiogö aser parnok ya Indian forces nung battalions tajungtüba rongnung ka ta züingshir. Ajisüaka parnoki aibelenä inyakba ajanga Indian Army-i tensa majungdak mapa shitak inyaksü renema maliba sayur.

Army-i maitüsü aibelen ta asüba ya tang tasen masü saka tang ya mezüing atema parnok dang jungjunga asüingdangya asür, ta police ketdangtsürisa ashi.

(Maneni tapak 10 nung...)

Nagaland sorkari R-Day onük jembiba nung tai apur: NPCC

Dimapur, January 28, 2022 (TYO): Nagaland sorkari Republic Day onük nung Oting lendong nung asürtem nem temeten agütsütsü aser AFSPA agientsü, ta NPCC president-isa metetdaksü.

Nagaland sorkari Naga yimten latettsü molunga lira Agreed Points agizüktsüla aser sendaktepa alirtem den külemi molungteper India sorkar dang mapa küma inyaksü ayongzüktsüla. Ajisüaka, parnoki yimten melatetnür aser tembanger aliba olemtep ano tenzükshinür, ta paisa ashi.

"Kin hoho 14, ANGBF aser tanga Civil societies-i yimten latetdaksünür ta onoki India sorkar dang ashidang 'People's Government' akhümtsübuttsüla ta parnoki langzü. Hao, democracy ka nung nübori kümteba sorkar akhümtsübuttsüla saka iba sorkar yagi tiyazü jembioogö kechiyong Nagaland nung alirtemi Agreed Position agizükogö saka sorkari ibaji mapa küma meinyaknür" ta K Therie-isa ashi.

Nagaland nung law & order ji telungpurtemi azüoka lir ta

ashitsüla kechiyong Dimapur nung ceasefire monitoring cells 9 lapoka lir aser Nagaland indang gate ajak parnoki anüköer, ta paisa shisem.

Nagaland sorkari state nung nungdakba aser khurettem atema alizüing kecha mali. Nagaland nung infrastructure kanga mejungi lir, ghonda shia load-shedding asür, tongtipang jila aser state yimtüba nung water supply peria magütsür, yimtsüingtem nung health coverage mali aser mapa tasen kecha madoker, ta NPCC President-i metetdaksü.

Nüboritemi State Transport nung mesenzüteter aser sorkar den tesentaktep tajung alirtemi old age pensions agizüka agir. Sorkari traffic tebilemtsü atema mebilemer aser rongsenketzüing mesüra industrial sector ajungketttsü atema sentong kecha mali. Nagaland state sorkari shisaliok rejutem renlok daksütsü tebilemba kecha mali aser nüboritem dang terenlok bentsür arutsü nangzükba meinyaker, ta K Therie-isa ashi.

Nagaland nung law & order ji telungpurtemi azüoka lir ta

Rev. Yankey Patton süogo; CM & Dy. CM ajanga asükhu lemsatep



Dimapur, Aenjeti/Jan. 28 (TYO): Taoba State Chaplain, Rev. Yankey Patton, January 28, 2022 nikongdang 2:25 ako meta Diphupar nung par kidang asü, ta sangdong ka ajanga ashi.

Asür Rev. Yankey Patton den asüpila sentong ya Lotha Baptist Church Diphupar nung January 30, 2022 nü agitsü.

Asür Rev. Yankey Patton ya 1927 küm March 15 nung aso aser State Chaplain ka ama 1989 küm nungi 2004 küm March ita tashi inyaka liasü. Pa ya Police Chaplain ka ama 1987 nungi 1988 tashi inyaka liasü.

Pa kinungtsü ya 2014 küm asü. Par jabaso ka, semchir tenet aser tanabuba semchir asem yutsür pa iba lima nungi pilaogo.

Deobarnü Asür Rev. Yankey Patton den asüpila sentong agiba sülen pa indang tasü mang ya par yim, Raman nung bener oa aremtsü, ta sangdong ajanga ashi.

Taoba mapang Nagaland State Chaplain inyaka alisang

Rev. Yankey Patton tanü Diphupar nung par kidang asüba osang angashia temolung khurema jashir, ta Nagaland Chief Minister, Neiphiu Rio-i sangdong ka nung ashi.

Asür Rev. Yankey Patton ya Nagaland nung ajaki metetba aser akumtsüpüba pastor ka liasü, shiba 1989 küm State Chaplain mezü ngbuba akum aser 2003 tashi pai State aser nübürtem tenzüka aruogo.

Asür Rev. Yankey Patton ya bendanga agütsür ajemalua Tsü ngrem tenzüker ka liasü. Tamalen pa State Chaplain ka ama inyakba mapang pa nem sorkar indang facility kecha magütsü, pa senzüsempongtsü atema garia magütsü. Anungji pai anüshi ka amer tetsü ng agi jaja Legislator tem ki sema senzüa liasü, ta Rio-i ashi.

Yamaji pai ajemalua mapa nung temolung agüja inyaka liasü. Kasa mapang pa ya kangadang ochishir Tsü ngrem tenzüker ka liasü, anungji pai metsü bui ochi jembia.

Pa asüba ajanga state nung arogo tsütsü aser nübür tenzüker wadang nung lenir ka samaogo aser pa asüba ajanga tawa adokba asü ngtsü tasak asütsü.

Ajisüaka pa aser Tsü ngrem den lir ta amanga asen molung sü ngzüker, ta pai ashi.

Mangyimer kibong den asükhu lemsateper aser Tulusang Tsü ngremi parnok nem tesunep aser tashi tasen agüjang ta sarasademtsür. Pa tanüla tesunep nung anisü ngzüker, ta Nagaland Chief Minister-isa ashi.

Taoba mapang State Chaplain inyaka alisang Rev. Yankey Patton asüba osang angashia mangyim tejashi lemsateper, ta Deputy Chief Minister, Y. Patton-i sangdong ka nung ashi.

Asür Rev. Yankey ya bendanga agütsür Tsü ngrem tenzüker ka liasü aser tarendak makai jembiba nisung ka liasü, ta Y. Patton-i ashi.

Lanuwa mapang nungi pai kangki aputsü molungtet aser tasünü tashi iba kangki apua liasü. Wokha Town Baptist Church densema pa arogo balala nung pastor inyaka aru, Missionary at Large inyak aser Lotha Baptist Churches Association nunga 1975 nungi 1980 tashi Executive Secretary ka ama inyaka liasü, ta Deputy Chief Minister-i ashi.

Pa asüba ya Naga nung asoshi tebuti tajung ka samaogo, shiba indang tanüla aser dangar dak nungi alakteta litetba takum agi asen lenmang sangwatsütsü.

Dy.CM den pa kinungtsü aser kibongi mangyimer kibong den asükhu lemsateper aser asür tanüla teti tatem maka tesunep nung anisü ngzüker, ta sangdong ajanga ashi.

DALT ajanga tenü ngsang agütsür

Dimapur, Aenjeti/Jan. 28 (TYO): Indian Administrative Service (IAS) jenjangi ajungketba atema Tamsunaro Aier aser Obangla Jamir nem tenü ngsang agütsür, ta Dimapur Ao Lanur Telungjem (DALT) sangdong ka ajanga ashi.

Nenoki bendanga agütsür meranga inyakba ajanga iba takok ngutetogo aser tarutsü nunga ner wadang tali tajungba

sü dakjang ta moatsür, ta sangdong ajanga ashi.

Maneni ozü lenir T. Senka Ao nem Republic Day mapang President of India ajanga Literature and Education tsütsü Padma Shri Award konang agütsüba asoshi tejak tentetter, ta sangdong ajanga ashi. Meimchir tenzüker wadang nung Tsü ngremi nü sempet tali moajangba, ta DALT sangdong ajangasa ashi.

Manipur nung MLA ana JDU dangi meyip

Dimapur, Aenjeti/Jan. 28 (TYO): Manipur Legislative Assembly nung tang temendak zü ngsem ana JDU dangi meyip, ta Core Committer of NEEC, JDU for election to the 12th Legislative Assembly, Manipur ajanga sangdong ka nung ashi.

9th Thangmeiband Assembly Constituency nungi Kumukcham Joykishan Singh aser 40th Jiribam Assembly Constituency nungi Ashab

Uddin nati JDU National President, Rajiv Ranjan Singh (Lalan) aser party tekolak, Nitish Kumar (Bihar Chief Minister) lenisüba kübok inyaksü nangzüko.

Ano anogo ishika tsü ngta MLA pezü JDU nung adentsü imlar. Taküm Manipur state election nung JDU nungi candidate 20 shi yoktsü sentong lir, ta kasa sangdong ajanga ashi.

CPO kübok lokti balala shisatokden senden amen

Dimapur, Aenjeti/Jan. 28 (TYO): Chakhesang Public Organisation (CPO) ajanga Chakhesang frontal organizations- Chakhesang Mothers' Association (CMA), Chakhesang Youth Front (CYF), Chakhesang Students' Union (CSU) den 2022 küm asoshi mezü ngbuba shisatokden senden ka Phek Town nung January 27, 2022 nü mena liasü.

Chakhesang kin aser Naga nung ajungtsü mechi iba senden nung lokti tentet balala indang mangdang aser nükjidong lemsatepa tatsü-talang ajak jembia liasü, ta sangdong ka ajanga ashi.

Iba senden nung NNPGs balala tsü ngta telungjem alitsü, asen lima nungi ozü ng alema

senotsü saruba samadaksütsü, AFSPA (1958) agientsü, government aser private sector nung shisaliok achayangtsü, sobaliba ayak mesamai amshitsü, temolung agüja alu ayimtsü, district nung aliba ak farm ana tanaben shia arudaksütsü aser entrepreneurship onüktem nung temolung agüja jembia liasü.

Iba senden nung CPO tir Vezuhu Keyho-i jembiba mapang lokti tentet balala tsü ngta tangatetep alitsü nü ngdak, ta shia liasü.

Paisa tarutsü nung rangloker küm tepiyong inyaka aotsü sentongtem yanglua itemji inyaksü ajungshia liasü.

Iba senden nung Vecito Dozo, Vice-president CPO menden liasü.

COVID-19 pandemic mapang akoksaba aazüktsüla: Minister Kronu

Kohima, Aenjeti/Jan. 28 (TYO): COVID-19 pandemic mapang rongsenketzü ng akoksabatem agro-eco tourism ajanga aazüktsü nü ngdaker, ta Minister, Planning & Coordination, Land Revenue and Parliamentary Affairs, Neiba Kronu ajanga ashi.

National Bank for Agriculture and Rural Development (NABARD) Nagaland Regional Office, Dimapur ajanga January 28, 2022 nü The Deck, Hotel de Oriental Grand, Kohima nung State Credit Seminar 2022-23 ayongzüker nung jembiba mapang, state nung aluyimba maparen aser eco tourism tsütsü asendenshi ka melira rongsenketzü ng merenloktsü, ta Kronu-i ashi.

Tashidak wara aruba sülen asenoki rongsenketzü ng nung aoksar aliba bena arutsüla aser tekeratiba nung bena

arutsü atema lenmang tajungtibaji aluyimba aser eco tourism ya lir.

Iba atema state sorkari agro-eco tourism temaba jenjangi ajungkettsü asoshi inyaker, kechiaser iba sector nung teimla jenti lir aser itemji lenmang aser power sector tajungba akumba ajanga animesotsü, ta Minister Kronu-i ashi.

Nagaland nung aliba aluyimer ya azü mesen masü saka market peria maliba ajanga tezü atanger, saka tang connectivity tsütsü tajungba akumba ajanga market agi anü ngba tebilemstü aisü nung mali aser ano state telungzüker aser tezülen aluyimer nem market avenue agütsütsü meranger, ta ashi.

Nagaland nung ali temo peria lir aser iba den tzü-mopung tatsük, talem asen temokong aliba ajanga aluyimtsü atema ajunger, ta

pai ashi.

Nagaland nung ali agi anünger asünung coffee aser cardamom ama ali tila amshia product timba adokbatem nung rangloksüla.

"Asenoki itemji inyakra asenoki North East ajunga aser danga linüka mesütettsü," ta pai ashi.

Naga nung aluyimer senotsü agi tim atemer aser iba atema bank aser senotsü amshiba institution tem tejakleni arua sen aputsütsüla, ta pai ashi.

Ali kibur akumba aser banker den inyaksü asakba ajanga state sorkari State Assembly nung SARFAESI Act agizükogo, anungji bank temi mela mela loan agütsütsü aser loan memonokteter indang ali-kimong ya lisopur kisü ng dang yoktettsü, ta Minister-i ashi.

"Sorkari nübürtem asoshi süoki ia bilemstü, anungji

Assembly nung SARFAESI Act ya agizük aser kasa mapang Naga nung temeden wazüka yuja kimong-lushi ya Naga nung kisü ng dang ayoktsü melar," ta pai ashi.

NABARD nung tang general manager, Tiakala Ao-i aluyimer yaritsü molunga aliba atema pelaba lemsatepba mapang, NABARD, bank aser entrepreneurs temi yarinung dang state nung rongsenketzü ng jenjang tajungba akumtsü, ta pai ashi.

State nung sorkari 'land laws' tasen ka bener arutsü atema inyakteper, ta Kronu-i metetdaksü.

"Asenoki tali bendanga agütsür inyakti, kati ka dak tamang katepti," ta Minister-i ayongzüker.

Iba sentong nung Minister Kronu-isa NABARD, Nagaland Regional Office, Dimapur indang State Focus Paper 2022-23 sayaja liasü.

Yimdak yimtsü ngtem nung rongsenketzü ng temaba jenjangi ajungkettsü asoshi NABARD-i temolung agüja maparen balala inyaka arur, ta NABARD general manager, Tiakala Ao-i iba sentong nung ashi.

State Focus Paper for Nagaland for 2022-23 ajanga agriculture aser rural sector kübok terenlok atema inyaksangshia balala asoshi teimla aliba tejangja sayur, ta lai ashi.

SFP yagi state sorkar nem policy balala aser operational measure atema lenmangtem sayur, anungji aluyimba tsütsü terenlok asoshi mera balala agitettsü, ta ashi.

Iba yagi aluyimba sector dak sendakba nung banker nem osang tejangja agütsür aser tarutsü nung senotsü indoktsü asoshi maongka sayuteter, ta laisa ashi.

(Maneni tapak 10 nung...)



Directorate of geology and mining (DGM), Assam-i Karbi Anglong district nung nakmati asadangba mapa inyakba angur. Hill district tem nung iba ya coalfield pungububa asütsü. 1980 nungi tenzüker Karbi Anglong aser Dima Hasao district tem nung coal fields pezü ngutetogo aser item nung 2 million coal stock lir ta asadangtetogo.

Assam nung 'VIP culture' azüoker; CM convoy ajemer

Guwahati, January 28, 2022 (Agencies): Guwahati nung Chief Minister indang convoy nung gari trok dang senzüsü ta Assam Cabinet-i telemtetba agiogo.

Ajisüaka, CM indang convoy dang nungibo ambulance senzüsüba tongtipangba aser iba jagi ambulance manendaktsütsü ta parnokisa lemetet.

Tanga tesemtem aser district tem nung CM indang convoy nung Escort aser Pilot dena gari 12 tashi senzüsü akok.

CM senzüba mapang traffic jelia manendaktsütsü. Nüngdakra minute 2 tashi dang anendaktsütsü akok ta Cabinet-i telemtetba agi.

Nagaon district nung traffic

anendaktsüba atema CM Himanta Biswa Sarma-i tongti ketdangsür ka mezüngmeshiba atema ashishitepba sülen iba telemtetba agiogo.

NH 127 nung chief minister indang convoy süidaktsütsü atema traffic anendaktsüba atema CM Sarma-i yimjak nung Nagaon deputy commissioner Nisarg Hivare merenshi. Iba indang video clip ka local TV news channels nung sayu aser social media nung kanga prokshia liasü.

Nisung kari Sarma pusema liasü saka ano aikati yimjak nung IAS ketdangsür ka merenshiba atema pa aitsü.

Assam Cabinet-isa CM aser Minister tem nem sempet agütsüba anentsü telemtetba

agiogo. Assam nung district shia kümetetba anogo tenüing nung District Day amongtsü ta Cabinet-isa telemtetba agi.

Senotsü tsütsü timtem majurutsü atema CM aser Minister temi senotsü osang memeteti sangdong magütsütsüla. Ajisüaka, department tem den asüngdangyaba sülen sentong nung scheme kar inyaktsü nangzüksü akok ta Cabinet-isa telemtetba agi.

State Election Commission-i March 10, 2022 matongdang Municipal Elections atema anogo shima agütsü telemtetba agi.

Maneni, Assam Legislative Assembly indang Budget Session March 14, 2022 nungi tenzüksü telemtetba agiogo.

Mizoram nung nisung 2,064 dak COVID-19 putet

Aizawl, January 28, 2022 (Agencies): Mizoram nung Hokolbarnü nisung 2,064 dak COVID-19 putet aser parnok züingsema nisung ajak agi 1,67,725 kümogo.

Taoba Mongulbarnü nisung 2,222 dak COVID-19 putet liasü aser ibaji nisung teimtiba dak putetba liasü.

Anogo ananü tashi COVID-19 ajanga asür maliasü aser tang tashi nung nisung 591 süogo.

Tanü nisung 2,064 dak putetba nungi tanur 325 dena lir, ta ketdangsür kati ashi.

Mizoram nung tang nisung 13,721 anepaludar aser 1,53,413 taneptsü nguogo.

Mizoram nung Brihostibar tashi nung 16.53 lakh samples tendangogo.

"Brihostibar tashi nung nisung 7.92 lakh nem vaccine agütsüogo aser parnok rongnungi nisung 6.13 lakh-i dose anaprong agiogo" ta state immunisation officer Dr Lalmuanawma Jongte-i ashi.

Manipur nung Congress-i party 6 den tesentaktep yanglur

Imphal, January 28, 2022 (Agencies): Congress-i Manipur Assembly elections atema political party pungu den tesentaktep yangluogo.

Congress-i Manipur nung CPI, CPI(M), JD(S), RSP aser Forward Block den tesentaktep yanglu.

Manipur Assembly elections nung BJP madak takok angutsü atema iba tesentaktep ya yanglu ta Manipur Pradesh Congress Committee (MPCC) president N Loken-i ashi.

Imphal nung aliba Congress Bhavan nung political party 6-i osangbener den jembiba mapang pai iba osang metetdaksü.

"Onok külemi election nung tokteptsü. Onoki BJP madak takok angutsü atema alizüing kasa lir" ta pai ashi.

Iba senden nung taoba chief minister Okram Ibobi Singh aser CWC züingsem G Gaikhangam na dena party 6 nungi lennirtem aden.

Congress aser tanga party kari candidates indang tenüing metetdaksüogo aser item constituency nung sangdonga aliba candidate tem tokteptsü. Ajisüaka, candidate tenüing mesangdongi aliba constituency

tem nungi party temi common candidates shimtsü ta MPCC president N Loken-i ashi.

BJP tamakok ngudaktsütsü atema onok teloktepi akokba tashi raratsü renema lir, ta CPI Manipur State Council secretary, L Sotinkumar-ia ashi.

"Onoki democracy aser linük kümzüka ayutsü alizüing kasa yua lir" ta paisa ashi.

BJP yimsüsüba kübok alima nung democracy tulutiba lendongbang nung lir. BJP-i democracy alema inyakba, kin o kin tsüingda telemsa adokdaksüba aser ozüing alema inyakba ajanga political party tem sabang ka nung adenshidaktsüogo. Onoki iba tashi nungi linük kümzüksü, ta Sotinkumar-i metetdaksü.

"Party trok indang political ideologies toktsür BJP-i aniba NDA madak takok angutsü atema onok longjemogo. Tang nüngdabaji political ideology masü saka linük aser state kümzüka ayutsüba lir" ta taoba Manipur chief minister O Ibobi Singh-ia ashi.

Manipur nung party 6 teloktep indang tenüing aser common minimum programme yakta metetdaksütsü ta paisa ashi.



Mizoram kübok Thingsul nung aluyimer ka jala Hmangaihzuai-i Asian University for Women (AUW), Bangladesh nung Syngenta scholarship for admission ngutetogo. Iba scholarship atema nisung pungu shimba nung Hmangaihzuai densema lir aser \$375,000 (Rs 2.8 crore) scholarship nung tuition, room & board, health coverage, textbooks & supplies, den ano internship maongkatem angutsü. (Thingsul, January 28)

Assam Congress-i CM'er kibong anema bushisüngdangtsü akhanger

Guwahati, January 28, 2022 (Agencies): Assam chief minister Himanta Biswa Sarma'er kibongi ali atsünga agiba bushisüngdangtsü atema Assam nung Congress party-i Kamrup-Rural district indang deputy commissioner nem memorandum ka agütsüogo.

"Kamrup-R district Congress committee-i Kamrup-R DC dang RBS Realtors aser CM Himanta Biswa Sarma'er kibongi ali atsünga agiba ken o bushisüngdangtsü takhangba agütsüogo" ta Assam Congress-i metetdaksü.

Assam Congress general secretary Apurba Kumar Bhattacharya, Balika Pegu, Kankan Das aser Ghanashyam Kalita nungertemi anir Congress teshimtet telok kati DC nem memorandum agütsü. Ali atsünga agiba osang

temai adokba sülen nisung aikati bushisüngdang asütsü takhangba agüja arur.

Nüngtugu scholar Dr Hiren Gohain-ia Assam chief minister Himanta Biswa Sarma'er kibongi ali atsünga agi ta asüba ken o bushisüngdang asütsü atema takhangba agütsüogo.

"News reports nung osang peria dang lir anungji iba nungji ajemdaker bushisüngdang sütettsü. Bushisüngdang asü nung dang ochiba jungkai adoktsü" ta Dr Gohain-i ashi.

Assam CM kinungtsü Riniki Bhuyan Sarma dena külemi tenzüka real estate company ka nung tena jabaso Nandil Biswa Sarma-i shares aika lemsüka lir. Iba company yagi ali makar nisungtem aser rejutem asoshi lemsüksüba ali 18 acres atsünga agia lir ta The Wire-i bushitetba osang ka metetdakja liasü.



Guwahati nung Assam Chief Minister Himanta Biswa Sarma aser Assam police DGP nati TLA (Tiya Liberation Army) aser UGPO (United Gorkha People's Organization) telungpurtemi bener adoka agütsüba prangpongtem repringdangba angur.



TIR YIMYIM

YIMOBILEM (EDITORIAL)

DIMAPUR

KÜPTOKNÜ

AENJETI 29, 2022

Asenok ishika dang akümtsü!

Yaküm 2021 küm tatebanglen India tatar hoho anaprongla nung election nung vote enoktsütsü pur tenüing zülüokba electoral roll o Aadhaar card na sendakteptsü telemetba agiba yagi, asenok Nagaland nung alirtem dang masü saka India nung vote agütsütsü pur tenüing electoral roll nung zülüoka alirtem aika ageintsüsa adoktsü, anungji vote agütsütsü pur ishika dang akümtsü. Atangji, alima nung tzüa masen shitak inyaktettsüsa mapa kata mali, kechiyong shitaka aser meshitak akümtsüba ajakji nisungisa inyaker, anungji Aadhar card amshia electoral roll nung nisung tenüing zülüokbajibo noklang nung noklang shitak asütsü ta mali, kechiyong nisungisa inyakerji Aadhar card dena taila agizüka PAN card yangluba otsüa angashir. Ibayongji, electoral roll shitak küma yanglutsü asoshi tatartemi Aadhar card number amshia nisung tenüing jangjar külen dang electoral roll nung pa mesüra la tenüing zülüoktsü ta lemtetbajia nisung aikati aitsür aser iba mapa jagi tajung dangbo tamajungang teimba ataloktsü amai bilemer. Ajisüaka, nisung ka pa mesüra laji shitaka ta jangjatsüba, tang tashibo, Aadhar card amabo maka, anungji Aadhar card amshia nisung jangjashir külenang vote agütsütsü purtem tenüing electoral roll nung zülüoktsüba tim mapa ka tenzüker asütsü. Asen lima nung balaka election merüka agitsü indang kanga sashia jembir aser arogoi anir kanga meranga inyaker. Iba ama election merüka aginüba mapang linük ajaklen voter ajak pei Aadhaar number agi jangjashitsü lemtetbaji Tsüngrem nungi teyari yok ama asütsü. Atangji, asen lima nung dang masü saka tesem ajaklen election mapang tashiyim aser sübokrem amshiba osang angashir, ajisüaka election timi agitsüba yabo asen lima nung jembiba ama tanga tesemtem nungbo kangabo mejembir. Ibaji, ashiko, tang state-tem nungbo asenok amai alima nung maliba nisungtem tashibo electoral roll nung zülüoka malitsüa akok, mesüra asenok ama nisung kasa ser tesem aika nung tenüing zülüokdakja malitsüa akok. Ibaji dang masü saka asen lima nung election mapang kibong ka nungisa tsürabur khen, tanurtem khen aser kibong ajunga khen ta pei vote ayokba amabo meyoki alitsü. Aji oda, asenokbo senso candidate shimtsü asoshi jelia election tilaka ka agimatsü, idangji lenirtem ayoktsü aser ano kasa vote-ji shitakba election aru dangbo jenjang tur ayoktsü ta senso candidate shimtsü maparen tenzüka anogo nungi vote magütsü tashi tatar yimsüsür aser nütsüing nübo ta mali, ajak yoktenyokraba oset ama ka dang kümadoker. Iba jagi kasa linük aser kasa temzüng kübok election agir süaka, tanga state-tem dang nungibo, asen limasa tejanaba aser memerüka küma asenoki election agitetter. Ano, asenoki election nung ochimashi mapa ka, ochishia inyaker amai inyakba mapaji electoral roll nung nisung tenüing meshitaki talila zülüoka alibatam raktepba ya asütsü. Ibaji shirnoki kokdir, item meyong vote agütsütsüba kaket ajak ketdangsertem nungi meshia bendena ayutsü aser vote agütsütsüba anogo nung item taila tenüingtem tenüing nung nisung kari ajentsü. Aji oda, asen lima nungbo election anogo nung proxy vote ajenertem-ang nokinketer ama tushia amshiba asenoki angur. Ano, tesem kar nungbo yimten telok-tem rongnung tangatetep nung tiyazü nisung tenüing electoral roll nung enoka alirtem proxy vote-temji alemtsü. Meraratepi tangatetep nung proxy vote alembajang asenok asoshibo ochi aser teindan g mapa ta agizüktetba tashi nungjibo asenok shisatsü aser tangatetba mashileni talangka ogo ta bilemdi. Ibayongji, meshitak dang shitaka ta ajar aser tanak dang temesünga ta marendaki shitettertemji asenok kümogo. Asen lima jungnura iba mashilen lenmang nungi shitakleni meyiptsüla. Joko, tsüraburtem asoshibo yanglushitsü menur asütsüa akok saka asen chirnurtem danga pei lima aser pei mapa agi nümadanga lidaktsünura, vote sen agi ayokba aser aliba, senso candidate shimba, sen aa tangar vote enoktsüba, proxy vote lemsaa enoktsüba, town nung alirtemi yimtaklirtem mesüzüka taküm raksatsüba aser yimtaklirtem election lu yima yur town-len jajaba mapatem ajak anentsüla. Joko, Aadhaar amshia electoral roll merüktettsü apusorji, asenok constituency ajak nung vote kanga ishika dang akümtsü. Ashiko, asen lima nungbo district karbo constituency ka asütsüa metemsüi akümtsüa akok. Alima nung alirtem ajak temenen nisung, Tsüngrem aser nisung tsüngdang kata temeshiba aser tetemsüba mali, ajisüaka alima nung meyazüi shitak indangindanga alitsü merangba nisung o kenyongi tiyazü aser ochimashi mapa inyaka alitsü dang bilemba nisung na tsüngdaji tepila talangka lir. Aji oda, asenoka shitak melitetaka, shitak alitsü merangertem telok nungji danga adentsüla.

OLEMSABANG

Ni ya shiner

Bendang Imsong, Social Activist, Mkg.

NISUNGI NISUNG HAU TA MALIBA

Ni tanü putu asen neburtem repranga arunung (Tajung) Positive masü saka (tashimait) Negative dang jembiba neburtem aika angur. Meimchir asünung nisung ka dak tajunga lir aser tamajunga lir. Saka nisungbai tajung jenti inyaker sürnung tamajungji dang tuteta yimjak nung jembir. Shirnoki pei-ibo kecha meinyakteter sürnung tangari junga inyakba majiner, aser tashimait bushia itemji jembir, parnokji nukmeremertem lir. Iba ama nukmeremertem aser tashimait dang tutepba jembiba ajanga kecha tajangzük mangur, saka ibaji ajanga telok tesendaktep samadaktsür, lokti nung terenlok samar.

LENIRTEM: kari nai tajung inyakaka ne dak tenük meremra tejashi. Parnokji nü dang nungi tamajungba asüba agi tenük meremer ta angatedang.

Asenok ajaki ya angatetti: Kodang asenoki kati ka taoba ta yariteptir, tajung nung tajunga ta tenüingsang agütsür, kati ka akümtsübuteper, tashimaitbatem o tajung agi melenshiteper, item ajanga teputep, terenlok, jangraba ajungmesotsü, aser kija aser lokti tejakleni aotsü. Kodang iba terenlok kibong aser lokti nung ngudir, tangeri akümtsüba ajitsü aser iba shisatsü angazüki asen yimkong bushia arutsü.

Lenirtem dang ya shiner:

- * Ni shiba aser kü lenisüba koma ta teti shisadanga inyakang.
- * Lenir ka asoshi asalandongji tongtipangtiba hatir lir, anungji na meketa lokti nung tatalokbatem metetpela liang aser item tebilemstütemji asadanga lentong atongtsüla.
- * Kangabo maritebi ken nung mera ka dang agiang.
- * Teindang aser Ochi jembir den tembar yimang, aser parnok O nai tesendok.
- * Iba dak alaka ajak den tesendaktep tajung uang (liberal).
- * Khuret arudang jenzüka aotsü tebilem.
- * Telemetba tasü ita agüjang, saka nai koba jangrar ta masü saka loktii koba jangrar aser koba ajanga lokti tajangzük angutsü iba nung telemetba agiang.
- * Lokti nung koda jembishinütsü meteta liang,
- * Lenir kaji pei sasa azüoka aliba taküm asütsüla.
- * Teti ochi nung tasü ita nokdakang. Teyazü nung pu-tesem.
- * Aibelendang "Ni aibelenogo" ta shitetang. Lenir ka dak sempet tajungtibaji "Ni aibelenogo ta shitetba ya lir.
- * Asüküm mesüi inyakang aser danger dang meima benshiang.
- * Ne sülen na mesükba lenir tajung aniteta ayutsü mangdang nung lenisüang.
- * Ajak madak Tsüngrem tsüba tenzükan.

Temeshi Lai-i yamai ashir, "Tamajung inyaktsu asoshi telok tuluba sülen nai tanidak, mesüra obendangdak ochi meyipsatsütsü merangba telok nung na teten" .ANITET 23:2

"Molusongzü mulungjang ama tasü tait liang aser Ochi ne sobutsü kümdakjang, Temeshiba Kin ka ajungketsür süra temeshiba nung asen yimden yimli tejakleni anir aotsü ayongzucker" Tesüngremi tangashir ajak moajang.

Tsüngrem dang sentsüwangshi aser asen ao kin (Gloria dei)

- Tiatoshi Longkümer, Kohima

(Yashi adok nungi...)

Ao Kin aser Tsüngrem sentsüwangshi:

Tanü asen Aoertemia Tsüngrem dang sentsüwangshi süang, Amen ta ashir asü, mesüra asen sentsüwangshi bushiba nung temulungjangbo yua ali? Asen tetsü-tebu alimapur aser tokolak bushitepa mapang, asen kin aser kidongtemi "konang nungsang aser takok" otsü dang jembishi, tamakok aser tangar teyari agiba otsübo meimbanga yur mejembi aser iba shisatsüji ano asenok dang mesamai lir. Aoer otsü teimba ka "ozü yimeri mesüra kidongi kokteta aru" ta asüba otsü dang ashi, "tangari ozü akokba otsübo" aikabo mali. Asen Aoer ya "tayak asang" dang agir, tamakokbo aiben meimbanga yunüba kin ka lir. Aser tanü Khrista yimsü arura kesa jakla nung linüra, asenok takoksa tulu Kibuba nungi angutsü.

Ao lima tenemi Khrista osang tajung arur külen asen kin mezüng tamangtirtemi koma inyak, aji khen lua bilemdangra, letep-tsüng aser konang -narokum bushiba mapang nung kodang Yisu Khrista osangtajungji agizük, idangjisa, asen mezüng tamangertem pei tetushi aser narokum ajak toktsü aser Tsüngrem sentsüwangshiji dang angu aser iba indangji dang khulü asü. Tsüngrem ajungba aser pa sentsüwangshi tebur ajungji parnok parnok atema dangbo meyutet nung, Ao lima meketa aliba kintem, talisa Tzüla ayong külen alir kin, aser Lotha/Sema kin dangi iba sentsüwangshi indangji ashitsü ao. Aser tammang nung alirtemi iba tesangwa tuluj angudang, iba sentsüwangshi jagi parnok pua aser parnokia Khrista yimsüji agizük. Asen tsüraburtemi Tsüngrem sentsüwangshiji metetdaksütsü atema timtim, tekangshi, mezüngmeshi, aser tasüba arem. Anungji, Tsüngremia asen tsüraburtem Pa sentsüwangshi atema moatsü. Aji oda, asen Ao kinji Naga kin aika asoshi lenir aküm.

Yangi tangatettsü tongtipang kaji ya lir: tanga kini asen sülen anidakbaji asenok ngur anidakba masü, saka asenoki Tsüngrem sentsüwangshiji tuyua sayu nung parnok aji süngmangseta repranga asen sülen aser asen den jaja. Koba tensa nung asenoki pei kin konang aser sentsüwangshi toktsür Tsüngrem sentsüwangshi indang sayutsüngi iba mapang tashiji tangari asen sülen anidak. Saka koba mapang nung aseni Tsüngrem sentsüwangshi sayuba anener asen sentsüwangshi tanaben bushi tenzüka iba mapang nung jagi tangari asenok toktsü aser ano toktsütsü! Taoba mapang aser tang tensa medemdangra ya Tsüngremi asen sendok masü, saka aseni Pa sentokba ajanga atalok ta angateter. Asenoki tejen otsü (past glory) nung temulung lemer tanüa yangji dang lidar ama bilemra asenok tesüleni lujen alutsü.

O tem: Taküm ABAM küm 150 jubilee (SQC) amongdang asenoki asen sentsüwangshi aser konang bushiba ajak endokdi, aser Tsüngrem sentsüwangshi dang bushidi aser sayudi. Tanaben asenoki Tebu, Techir aser Tanela temeshi ain aser sentsüwangshi aser temeshibaji tangar dang sayutetra, iba sentsüwangshi bushirtem aser reprangnür jenti asen den adentsü, aser iba jagi Tsüngrem tali sentsüwangshidaktsütsü. Koba kini Tsüngrem sentsüwangshidaktsür iba kinji Pai ajungkettsü aser amshitsü. Atangji, taochi agi sünga aliba Kibubai-bo asenok nem tanaben maongka bener arutsüogo - Jubilee temoatsü. Arung, tamanger shiai iba temoatsü ya mechiki agitettsü asoshi Tsüngrem dang sentsüwangshi süng, Amen ta shidi.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Iran linük nung Khristantem maneni reshikangshir: CSW



Iran nung Islam yimsü toktsür Khristan yimsü dangi meyiper nisung 9- Mohammad Vafadar, Kamal Naamanian, Hossein Kadivar, Khalil Dehghanpour, Behnam Akhlaghi, Mehdi Khatibi, Babak Hosseinzadeh, Shahrooz Eslamdoust aser Abdolreza (Matthias) Ali-Haghejad nunger noksa nung angur. Court kati parnok tepuokdak ayutsü obendang agütsü, saka Supreme Court-i parnok anema benokba ken o reprangshitsü tuyuogo.

January 28, 2022: Iran linük nung maneni religious freedom anema inyaker aser Khristantem kanga reshikangshir, ta meimchir temeden anema inyaker temi metetdaksü.

Christian Solidarity Worldwide (CSW), Article 18, Middle East Concern aser Open Doors International teloktemi külem report ka ajanga, 2021 küm nunga Iran nung Khristantem anema inyakba tatalokba aika liasü aser Khristan 59 apu, ta metetdaksü.

2021 küm Iran nung Khristan 30 tepuokdak ayu aser ketdangsertemi 34 apu, court-i nisung 209 anema obendang agütsü aser iba nungjagi nisung 35 bo kanga reshikangshia liasü, ta kasa report ajanga metetdaksü.

Khristantem tepuokdak ayuba aser reshikangshibaji iba dang nungjagi timba asütsüa akok, kechiyong item ama tatalokba osang aika report masür.

Ajisüaka ano tatalokba kar nungbo Iran nung Supreme Court-i Khristantem pusema ochi obendang agütsüogo.

Yaküm November ita nung Supreme Court-i, Khristan

yimsü dangi meyiper nisung teku anema obendang agüja alibaji reprangshitsü nungdak, kechiyong linük nung Khristan yimsü aser Zionist ajungkettsübaji linük security atema amokmeren ka masü, ta metetdakja liasü.

Supreme Court-isa, house churches nung inyakba mapatem aser 'Zionist' Khristan yimsü ajungkettsübaji ozüing alema inyakba mapa ka masü, ta metetdaksü.

Item ama ken otem meyipa reprangshiba sülen Khristan karbo chiokogo.

Ano külen Dezful yimi nunga court-i, Sharia ozüing kübok Islam yimsü toktsübaji ozüing alema lir, ta metetdaksü saka Khristan yimsü dangi meyiper nisung 8 anema obendang magütsü.

Christian Solidarity Worldwide (CSW), Article 18, Middle East Concern aser Open Doors International teloktemisa Iran sorkar danga senso ajak nem freedom of religion or belief (FoRB) temeden agütsütsüla aser tiyazü nung tai tonglokja tepuokdak yua aliba Khristan ajak chioktsüla, ta takhangba

agütsüogo.

Parnokisa Iran sorkar dang house church organisation anema meinyaktsü mepishiba den külemi alima linüktem danga Iran-i religious freedom anema inyaker, anungji Iran ketdangsertem den yimtenren aser shishilembaba dak sendakba senden amenba mapang nung Iran sorkar den iba atemaji süoka jembitsü ayongzük.

CSW tentetsang aser Tir, Mervyn Thomas-i, "Iba report ajanga Iran nung maneni Khristantem anema inyakba lephsia metetdaksür," ta ashi.

"Onoki Iran sorkar dang onoki benokba onüktem mapa küma inyaktsü aser linük nung yimsü balala amangbaji ozüing alema inyakba mapa ka ama mezüingshitsü atema mepishir," ta paisa metetdaksü.

"Onokisa sorkar dang, International Covenant on Civil & Political Rights kübok Arrla 18 nung shia aliba ama Baha'i, Gonabadi Dervishe, Humanist aser Sunni densema senso ajak nem yimsü dak sendakba temeden agütsütsü mepishir," ta paisa metetdaksü.

Mel Gibson aser Mark Wahlberg na indang 'Father Stu' film sayatsü



Mel Gibson & Mark Wahlberg

January 28, 2022: Khristan yimsü nung ajemdaker yangluba film "Father Stu" nung Hollywood actors Mark Wahlberg aser Mel Gibson nati shilem agiogo.

Sony Pictures film ya Rosalind Ross-i zülua direct asü, aser iba film ya taküm Good Friday (April 15) nü sayatsü. Iba film ya Ross-i tang mezüing direct asüba film lir.

'Father Stu' film ya tsüingteper ka Khristan putir akümsang, Father Stuart Long taküm otsü nung ajemdaker yanglu.

Iba film producer, Wahlberg-i film nung tongti shilem agir aser kasa film nung Academy Award angusang, Mel Gibson-ia shilem agia lir. Kasa film nung Jacki Weaver aser Teresa Ruiz natia shilem agia lir.

"Father Stu ya timtem

agütsür nisung ka nungi putir ka akümba otsü lir, aser pa taküm otsü ajanga ni densema nisung aika ajungmesor. Iba film ajanga asenok ajungshitsü aser pai inyakba ama asenokia mapa tajung maneni inyaktsü ni imlar," ta Wahlberg-i metetdaksü.

Ano külen, tang Mel Gibson-i "The Passion of the Christ" film tasen yangludar aser Warner Bros atema "Wild Bunch" aser "Lethal Weapon 5" film otsü zülua direct asütsü atema pa shimogo.

Taoba mapang interview ka nung jembidang Wahlberg-i pa atema Tsüingrem den mapang indoktsüji kanga tongtibang, ta lemsatepa liasü.

Wahlberg-i, "Honibar aonung Broadway show ka reprangi aotsü agibo Tenla kidangi ang aotsü, kechiyong anogo shia ni kü tamang jenjang asadangner," ta lemsatepa liasü.

ANO GO ABEN TSÜNGREM DEN

Alangzükba züh

"Saka tarak aser pungmen maket san chanu senti züh, oda Khrista züh agi nenok alangzük, aji meteta nenoki tetsübu nung nenok aenersa amungba mapang süidakjang." 1 Peter 1:19

Tejen ozüing putu nung nisung taküm ka ozüing ajanga taitsuba ngur lia iba nung jagi alangzükba akhi jenjang dangi bener arutsü asoshi san tebong rongnung pungmen mesüra tarak maketba shimteta, iba sanji tepseta azüh tenlaba agi, takümji tanaben meyipa alangzükasa aru. Item putu nung sen zühji taküm ka alangzük asünung kanga dang tematiba jenjang nung senti süa amlepa aruba angur. (Levi 22:19-20). Kodangsa pungmen aketba shiruru tenla, idangji Kibubai magizük aser shiba asoshi tenla, idangji Kibubai magizük aser shiba asoshi tenla pa taküm nunga temelenshibaji marur; saka kodang ozüing aginüba ama san pungmen makaba zühji tenladir ibaji Kibubai agizük ta parnoki amanga benlepa arua liasü.

Iba ama tangatetba nung amanga aser benlepa aruya aliba mapang ka nung Tsüingremi Pa ajaso chir Yisu Khrista alimai yoka, oda kangkidong nung pa senti züh toklepa tematiba tenla tenlaba agi Pai meimchirtem khenyongi, teti atema takümji alangzük. (Ibri 10:10).

Sarasadem

Kibuba Yisu, Ne senti züh ajanga kü taküm teti asoshi alangzük nung Ne tenüing asanger. Amen.

Shane & Shane-i tetushi aser tekülem kensep tasen ka sayaogo

January 28, 2022: Tetushi lir aser ken ajakji Tsüingrem O aser tekülem kentener, Shane & Shane-i tanurtem aser kensep nung "Come and See kibongtem atema kensep tasen ka sayaogo, ta osang ka ajanga metetdaksü.

Tawa interview ka nung jembidang, Shane Barnard aser Shane nati 'Worship in the Word' kensep adokba indang lemsatepa liasü.

Bernard-i, "Künati tetenzük nungbo kechi ken atentsü mesüra kechi inyaktsüar memeteti liasü, saka Laishiba nung keta aliba atentsü ta bilema liasü," ta ashi.

Iba kensep ya Hokolbarnü (January 28) sayaogo aser iba kensep ya Shane & Shane na indang Kingdom Kids mapatong kübok tang mezüingbuba kensep lir, koba ajanga kibongtem aser tanurtem den Khrista osangtajung lemsateptsü.

'Worship In the Word' den külemi Mongolbarnü RightsNow media-i sayaba Bible study indang video library series stream asütsü. Episode den apet episodes shia nungji kensep tasenba nungi ken kaka alitsü.

Shane & Shane indang kensep tasenba nungji ken ter

ajanga ajungshia züluba lir. Iba kensep nung "Come and See (Psalm 66)," "Your Ways (Isaiah 55)," aser "Yes and Amen (Ephesians 1)" kentem densema lir.

Everett-i, "Asenok ajak tanurtem lir, anungji asenok ajaki item ken jangratema angatsü akok. Tsürabur aser tanurtemi Tsüingrem O ochi angatetsü aser Temeshi Tanela den Pa O ajanga temelungjang melenshitetsü," ta ashi.

Paisa, "Kechiyong asenoki Tsüingrem O nung tashi tulu lir ta amanger. Iba project atema ibaji onok sarasadem. Tsüingrem tenangzükbatem aser Tsüingrem O ochi asenoki metettsü," ta ashi.

Shane & Shane na mezüing Texas A&M University nung ajurutepba sülen tenati Laishiba nung ajemdaker kensep 40 adokogo aser itemji million 613 dak tema stream asüba den YouTube nunga million 100 dak tema views jungogo.

Yaküm Gospel Coalition-i Shane & Shane indang kensep Psalms, Hymns & Spiritual Songs, Vol. 1, Best Christian Music of 2021 shimteta liasü.

OLONG PAITEP # 6066


1			2		3		4		5	
6		7								
					8					
9				10						
						11				
			12							13
	14								15	
						16				
			17							
									18	
19										

TIPIEN 2. Teburtemi tejak nung awaba - (8) 6. T _ _ _ em - (3) 8. Tzük ayudak - (3) 9. Nungdakba dang timba - (6) 11. Züina ao - (4) 12. Yangi tzü angur - (5) 14. Tangar dang nungi tali - (4) 16. Senyong masü - (6) 17. Oadokdi - (3) 18. Tzü tarok - (3) 19. Yimtaklir aikati iba ya ki den külemi yanglusemer - (8)	LANGTSÜNGLEN 1. Temejangdak - (6) 3. Nisung ka mapa inyaksü nübo - (4) 4. Azüntsü asoshi mejemba - (6) 5. Tesangwa agütsüba - (5) 7. Tila masü - (4) 10. Tebenjem tetsür chanu - (4) 11. Tekolak nung inok - (4) 12. Tetsüngda - (6) 13. Tangar inyakba ka inyak - (6) 14. Tim masü ta ashi - (5) 15. Asalendong - (4) 16. Tanüdangtsü - (4)
--	---

OLONG PAITEP # 6065 TELANGZÜBA

TIPIEN : 1. Tanga, 6. Wara, 7. Rajang, 9. Anük, 10. Jenjang, 11. Alar, 14. Ngashi, 15. Nala, 16. Mechi.	LANGTSÜNGLEN : 2. Anga, 3. Yabang, 4. Tarok, 5. Orak, 8. Ainer, 9. Anema, 10. Jabili, 11. Among, 12. Miim, 13. Anem.
---	--

Noksa nung meputepi aliba 7 bushiang




TANÜBO NAI LANGZÜANG

Q. Linük kobai 'COMPETES Act of 2022' saya?
 [A] Russia [B] USA
 [C] UK [D] Australia
 _____ (Taruba adok nung onoki langzüksü)
 YASHI ADOK TELANGZÜBA: Meta

AO OSHI ANGAZÜKDAK:
TANÜ ANGAZÜKTSÜBA OJANG

Melemsa
 (adj) jangratemka mali (boring)
 * Kidang tanurtem maliba agi melemsa akümer.

Melemsa'
 (v) malem, lema magütsü (did not share)
 * Onok lemozüka sen melemsai dang bank nung ayu.




Tir Yimyim

Tepela Tasoba Anogo

Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

1. Tenüng :
 2. Tasoba anogo:
 3. Küm : 4. Class :
 5. School :
 6. Talidak :
 7. Salem osang :



NAI-A YA METETTER MA

INDIA NUNG AIRLINE TAJUNG KAR:

1. Vistara	2. Indigo	3. Air India
4. SpiceJet	5. GoAir	6. AirAsia India
7. Air India Express	8. Alliance Air	9. TruJet
10. Star Air		

SUDOKU # 6106					TELANGZÜBA # 6105												
				8		9			3	6	8	4	9	2	5	1	7
		3		1					5	9	7	1	8	3	6	2	4
2				7	6				4	2	1	6	5	7	3	8	9
				2					1	7	5	2	6	8	4	9	3
	9	4		8	2				9	3	2	7	4	5	1	6	8
7	1			4	9		5		8	4	6	3	1	9	2	7	5
1			9			5	3		6	8	9	5	3	1	7	4	2
5	7					8	4		2	5	4	8	7	6	9	3	1
					6		2	1	7	1	3	9	2	4	8	5	6

OJANG LUTEP # 5652

NSAEI : [] [] [] [] []
 AANKG : [] [] [] [] []
 ANDG : [] [] [] []
 AAINÜGB : [] [] [] [] [] [] []
 OMSTTEE : [] [] [] [] [] [] []
 SEETAANK : [] [] [] [] [] [] [] []
 SREA : [] [] [] []
 LUNAAAEP : [] [] [] [] [] [] [] []
 HITSÜSAM : [] [] [] [] [] [] []
 AMRRNGEE : [] [] [] [] [] [] [] []

OJANG LUTEP TELANGZÜBA # 5651
 ASAYAR AJAKI MERANGA TOKTEPER SAKA TAJUNG TIBA
 KATI TEMABA JENJANG TONGTETTER

TAN HOPTA ATEMA - KOMA SÜLA ?

Q. Covid ajem ya maginürbo magidaktsü nunga koma süla ?

Olong 20 shi nung January 28, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzubatemi taruba Honibarnü adoktsüsü.



Mumbai, January 28, 2022: Hokolbarnü Mumbai nung aliba Azad Maidan nung Maulana Azad Vichar Manch züngsemtemi 'Why I killed Gandhi' film anema longkak aitba noksa nung angur.

India-i Philippines dang missiles ayoktsü tezüngzüktep agi

New Delhi, Aenjeti/January 28 (Agencies): India-i Philippines linük dang BrahMos missiles ayoktsü atema India nung BrahMos Aerospace Private Limited (BAPL) aser Department of National Defence of Philippines na tsüingda tezüngzüktep ka agiogo, ta Hokolbarnü Ministry of Defence-i sangdong ka ajanga metetdaksü. Iba tezüngzüktep kübok India-i Philippines nem Anti-Ship Missile System agütsütsü. BAPL ya Defence

Research & Development Organisation (DRDO) sentep company ka lir. Defence Ministry-i, "Iba contract agiba ya India sorkar indang mapatong- defence exports ajungkettsüba dak sendakba tongtibang mera ka lir," ta metetdaksü. Tezüngzüktep agiba mapang nung India team nungi BrahMos CEO, Atul D Rane, Deputy CEO Sanjeev Joshi aser Lt Col R Negi nung liasü. Item missiles ji Philippines nung Navy atema lir.

Tan ita tetenzüklen Philippines-i US dollar sen million 374.9 agi India dang nungi Shore-Based Anti-Ship Missile systems alizütsü atema melunga liasü. Tesüiba ita ishika DRDO aser BAPL nati iba missile ya tembar bendanger linüktem dang ayoktsü atema inyaka arudar. Tang mezüng India-i iba missiles timba bendang linük dang ayoktsü atema tezüngzüktep agir, aser maneni tanga linüktemia iba missiles mangatsü imlar.

Congress-i tanga party tem den longjemer inyaktsü bangjem

New Delhi, January 28 (Agencies): Parliament nung Budget senden tenzüktsü mapang ana nung lia Congress party nung bangdak lenirtem video conferencing ajanga senden mena taruba Parliament atema o lemtepa telemteba kar agiogo. Osang angazükba agi, Congress Parliamentary committee-i tanga party tem den külemi longjemer inyaktsü bangjemogo. Congress Tir, Sonia Gandhi leniba nung amenba senden nungji Lok Sabha aser Rajya Sabha naprongla nungi lenirtem aden. Senden nung parnoki taruba Parliament nung benoktsü atema onük kar süoka o lemtepa den külemi tanga opposition party tem-a ayongsemtsü atema jembiogo.

"Taruba budget session atema asalentongji balaka asütsü, kechiyong asen jakdang assembly elections lir," ta committee züngsem kati metetdaksü. State pongu nung assembly elections agitsü mapang ana nung lir, ibayongji opposition party temi Parliament nung kanga tongtibang onüktem süoka o lemteper. Congress-i Parliament House anaprongla nung Uttar Pradesh kübok Lakhimpur Kheri nung gari agi aluyimertem menüngsetba tatalokba, osettsüset aser chiyungtsü nung jenjang kanga atuba, mapa manguba tebilemstü, tensa majungba, China nung den arrtsü mangatetep ken o, Air India nija dang ayokba aser sorkari coronavirus wara

mazioktetba onüktem benoka jembitsü tebilemba lir, ta osang angazükter. Parliament Budget senden January 31 nü tenzüktsü; iba anogo nungji linük Tiri House anaprong den jembitsü, aser iba senden ya April 8 nü tembangtsü. Senden mezüngbuba shilem February 11 nü tembangtsü aser ita ka shi lir sülen ang tanabuba shilemji March 14 nungi tenzüktsü aser April 8 nü tembangtsü. Tang linük nung coronavirus kanga prokba nung ajemdaker MP tem densema Parliament complex-i aoer ajak ket nung RT-PCR negative report alitsüla aser vaccine anaprong agiba certificate alitsüla, ta parliamentary osang ka ajanga metetdaksüogo.



January 28, 2022 nü Mumbai nung Lokmanya Tailk Marg Police Station nungi police temi hon seret 17 den auer 10 sayaba noksa nung angur.

China-i rakzükba li India-i kodang meyipa angutsü?: Rahul Gandhi

New Delhi, January 28 (Agencies): Brihostibarnü China nung People's Liberation Army (PLA)-i Arunachal nung arrshi küm 19, Miran Taron Indian Army ket nung agütsüba sülen Hokolbarnü Congress lenir, Rahul Gandhi-i, China nungeri Taron meyipa agütsüba osang angashia pelar, ajisüaka China nungeri rakzükba li asenoki kodang meyipa angutsü?, ta asüingdang.

süngzükter. Ato kilonser, China-i atsünga agiba li India-i kodang meyipa angutsü?" ta asüingdang. January 23 nüa Rahul-i twitter ajanga, "Sorkar ka lira, nenok teinyaktsü mapa inyakang. Miran Taron meyipa anir arung! #MiranTaron!" ta metetdakja liasü.

Brihostibarnü China nungeri Arunachal Pradesh sepaitemi Arunachal Pradesh kübok Wacha-Damai interaction point nung Indian Army ket nung Taron agüja liasü.

Brihostibarnü Minister of Law & Justice, Kiren Rijju-i twitter ajanga, "Tanü Arunachal Pradesh kübok WACHA-DAMAI interaction point nung China nungeri PLA-i Arunachal Pradesh nungeri lanur, Miran Taron Indian Army ket nung agütsüogo. Iba maparen atema Indian Army-i PLA den meranga inyakba aser lanur kidangi meyipa anir aruba atema ni pelar," ta metetdakja liasü.

Rahul Gandhi-i twitter ajanga, "China-i Miran Taron meyipa agütsüba atema mulung



Rudraprayag, January 28, 2022: Uttarakhand assembly election jakdang Hokolbarnü Rudraprayag district nung Union Home Minister, Amit Shah-i kibok shia oa nüboyimba mapang nung tangokba noksa nung angur.

India nung ano nisung lakh 2.5 dak Covid putet

New Delhi, January 28 (Agencies): India nung ano nisung 2,51,209 dak coronavirus putetogo aser tang tashi nungbo linük nung nisung crore 4.06 tema dak iba tashidak puteter, ta Hokolbarnü Union health ministry-i metetdaksü. Tesüiba ghonda 24 tsüingda linük nung coronavirus agi shiranger 627 süogo aser ibaji densemabo tang tashi nung iba tashidak agi shiranger 4,92,327 süogo. Tang India nung coronavirus agi teshirangdakpur 21,05,611 lir, aser ibaji coronavirus caseload nungi shilem 5.18 lir, ta

Health Ministry-i metetdaksü. Tang anogo shia coronavirus positive putetba shilem 15.88 kümogo aser hopta shia positive putetba shilem 17.47 kümogo, ta health ministry-i metetdaksü. January 28 anepdang 8:00 ako tashi nung India nung nisung 4,06,22,709 dak iba tashidak putetogo aser coronavirus vaccine dose crore 164.44 dak tema tutsüogo. India nung yaküm May 4 nü coronavirus caseload crore 2 ajung, yaküm June 23 nü crore 3 ajung aser tan hopta coronavirus caseload crore 4 jungogo.

Taoba mapang Karnataka CM Yediyurappa'er semchir soseta asü

Bengaluru, January 28 (Agencies): BJP lenir aser taoba mapang Karnataka Chief Minister, BS Yediyurappa'er semchir, Soundarya lar kidang soseta sür lia angu.

asü saka magizük, anungji pa kidangi ilonga aoba sülen jabi agi kiji lapok nung la listü agi alenseta sür lia angu. Arrshi küm 30 dak tema Soundarya ya MS Ramaiah hospital nung doctor liasü aser la kinümbu aser lar chir kinü den telidak liasü.

January 28 nü Bengaluru nung Soundarya lar kidang soseta sür lia anguba sülen Bowring & Lady Curzon Hospital nung post mortem agidar, ta police-i metetdaksü. Soundarya ya doctor ka liasü aser la ya Yediyurappa'er jala tantsüla, Padmavathi'er jala lir. Küm ishika tejaklen la doctor, Niranjan den kibong aküm. Hokolbar anepdang 10:00 ako meta kilir kati Niranjan dangi call süa, shingai ki melapoktsür ta metetdaksüba sülen Niranjan-i la kinüngtsü dangi call

Karnataka nung Home Minister, Araga Dnyanendra-i, Soundarya tanur asoba sülen kanga tejashi nung liasü aser lar kinüngertemia ibaji meteta dang liasü, ta metetdaksü. Minister-isa, "Iba nung ya shinga dak melung malemstüsa mali, kechiyong la tanur asoba sülen tejashi nung liasü. Yediyurappa-ia la peladaksütsü atema mapang shia kidangi anir arua liasü," ta metetdaksü.



Misurata (Libya), Jan. 28, 2022: Migrant tem January 27, 2022 nü Misurata, Libya nung aliba Misurata International Airport nung tayimtsü kati atuba noksa nung angur. Niger nungi ozüng alema Libya-i aitba migrant 165 tashi par linüki meyipa yokogo, ta ketdangsürtemi ashi.

Southern Africa nung yipru agi nisung aika takum samatsü

Maputo, Aenjeti/Jan. 28 (Agencies): Tropical Storm Ana aruba sülen southern Africa nung tzümetsüng adoka nisung 70 dak tema süogo.

Madagascar nung nisung 48 asü aser nisung 130,000 shi pei ki yutsür khen atema atsükokdak tesem yanglua alidaki jena aotsüsa akum.

Malawi nung nisung 11 asü. Iba linük tesem ajunga nung power raksa aser tesem kar nung 'disaster zones' sangdonga lir.

Mozambique nung nisung 18 asüba osang lir.

Saka yangji aliba ketdangsürtemi asür tejangja memetet, ta ashir, kong tzümetsüng agi nisung 20,000 dak kongshia liasü.

Mozambique nung Ana yipru yagi ki 10,000 den school aser mozüki aika raksatsü aser

power line tem laodakja liasü. Iba yipru ya ajanga oaka region kar nung tzünglu tesashi aser yipru aruba ajanga tzümetsüng adoka liasü.

Ato Kilonser Carlos Agostinho do Rosário-i ashiba agi, par linüki teyari memeshir saka timtem ya linük ka tashi dang tuluba lir, ta ashi.

Pai tzüngsang-mopung tali tamajungba akumba indang shia liasü.

"Tzü-mopung melenshia aotsü atema kangabo shilem maliba linük ka lir, saka iba yagi tamajungtiba kongshiba linüktem rongnung ka lir," ta pai ashi.

Pai linük balala teyari meshia liasü aser UNICEF ajanga iba linüki nisung 45,000 shi teyari nüngdaka aliba yaritsü asoshi staff tem yoker, ta ashi.

Malawi nung state of natural disaster sangdonga lir.

Tzümetsüng ajanga electricity indang ki-o-jen aser nisung aliba ki nung kongshia jila aika tammang nung yutsü. Anogo aika lir power ya yanglu tenzükogo.

Timtem nung alir aser yirur alirtem yaritsü asoshi emergency camp 44 shi amenoka lir.

Hombarnü iba yipru yagi alinük nung kongshiba mapang Madagascar nung mezüng kongshia liasü aser iba linük nung timba asüba jangja lir. Linük yimtiba, Antananarivo nung aliba school aser gym tem nung nüburtem jenokdaksür.

Indian Ocean nung ano yipru tesashi ka kumtetba mapang lir, koba anogo ishika agitsü, ta tzüngsang-mopung takzür temi ashir.

Checkpoint ka nung Pakistan sepai aika tepset

Quetta, Aenjeti/Jan. 28 (Agencies): Hopta tetenzüklen linük southwest tsütsü Balochistan province nung security checkpoint ka amakba nung sepai ter asü, ta Palistan mitkartemi sangdong ka nung ashi.

Iba lendong ya Mongulbar aonung Kech area nung atalok, koba linük anüolen Iran den arütsü anasa lir aser provincial capital, Quetta nungi south tsütsü kilometre 600 shi pilar lir, ta Pakistan mitkari Brehostibar aonung sangdong ka nung ashi.

"Kanga sashia khatepba mapang kiralongrar ka tepset aser aika yiru. Kiralongrar temi amakba den raradang sepai 10 linük asoshi takum agütsü," ta sangdong ajanga ashi.

Tang tashi 'follow-up clearance operation' agir aser lendong atalokba sülen temolung melemi alir nisung asem puogo, ta Pakistan mitkar indan press wing ajanga ashi.

Iba lendong atema telok katia tenüng agia mali, saka iba region nung Pakistan mitkartemi ethnic Baloch separatist movement den küm ter dak tema rara arur.

Southern Balochistan nung Pakistani security forces dak lendong agütsüba tali akumer, aser Mongulbarnü checkpoint amakba ya ita ka tsüngta lendong tanabuba alitsü.

December 24 nü mejangjaba nisung kar Kech tesemi prangbong bener arua security checkpoint ka amakba mapang sepai ana takum samatsü, ta mitkartemi sangdong ka nung ashi.

Iba lendong ya Pakistan-Iran arütsü anasa border post ka amakdang sepai ka asüba sülen anogo ter lir ataloker alitsü.

Balochistan ya Pakistan indang province tulutiba saka nütsüng yongsük ishiba lir, kong tenem-tekong aika nung nisung mali.

Honduras tir inyaksü Xiomara Castro shimogo



Tegucigalpa, Aenjeti/Jan. 28 (Agencies): Xiomara Castro ya Honduras nung tetsürtem rongnungi mezüngbuba tir inyaksü tenangzüktep agiogo, ajisüaka legislative nung mangatetep adoka lir aser ano tetsükdaksü jenti lir.

Arishi küm 62 tain left-wing Libre Party lenir Castro yagi November 28 nü agiba election nung kanga junga takok ngua liasü.

Linük yimtiba, Tegucigalpa nung aliba national stadium ka nung Brehostibar nikongdang sentong ka nung la tenangzüktep agia liasü aser iba mapang Honduras nung meyerijang aikati nisan ayiptena, tsüngsanga aser ayimtena liasü. La teko nung tir indang sü apenloktsüba mapang la menürema liasü.

La indang inauguration speech mapang Castro-i ochimashi inyakyim aser bendanga amshiba anendaksütsü nangzük, koba

taoba administration mapang kanga liasü, ta lai ashi aser maka-mait jenjang nung alir atema lenmang sayutsü nangzük.

"Rongsenketzüng tsütsü tensa tia tamajung ni senmang amanger, koba aser linük otsü nung akhi mapang nungi lia aru," ta Castro-i ashi aser taoba mapang sentsüh shilem tenet agi timba akumba indang aitsü. "Lanu putu nem sentsüh menokdaksütsüsa ozü sorkari mapa tamajung meinyaksü," ta lai ashi.

Honduras nung Congress tasenba shibai anitsü ta atsütepa aliba mapang Castro ya tir akumer.

Honduras nung unemployment kanga sashia lir, mapang shia azüdokshi ajurur, ochimashi mapa inyakba lir aser ano healthcare aser educational system nung timtem balala ajurua lir, koba Castro-i reprangtsü nangzük.

(Maneni tapak 10 nung...)

Russia-i taruba ita Ukraine amaktsü akok: Biden

Washington, Aenjeti/Jan. 28 (Agencies): Russia-i taruba ita Ukraine amaktsü akok, ta US Tir Joe Biden-i tekum dangtsü ashi, ta White House ajanga ashi.

Kasa mapang Russia-i akhangbatem US-i magizükba sülen iba mepetmesü angateteptsü timla ajema angur,

ta Russia-i ashir. Tawa Ukraine arütsülen Russian sepai meyerijang aika adenshiba ajanga amaktsü akok, ta tsübuteper.

Saka Russia-i amaktsü sentong mali, ta ashir.

US tiri iba o ya Ukraine Tir Volodymyr Zelensky den Brehostibarnü telephone ajanga

jembiba mapang ashi.

"Russia nungeri February ita Ukraine amaktsü akok ta Tir Biden-i ashi," ta White House National Security Council odongtar Emily Horne-i ashi.

"Pai iba ya yimjak nung shiogo aser iba indang ita aika nungi jembia arur."

(Maneni tapak 10 nung...)



Jakarta, Jan. 28, 2022: Indonesian Red Cross Society züngsem kati Jakarta, Indonesia nung aliba school ki ka nung January 28, 2022 nü mesen tepsetba mozü akhaba noksa nung angur. Brehostibarnü Indonesia nung COVID-19 cases tasen 8,077 puteta liasü.

MULUNGNEN O



ASO: 16/03/1944 - ASÜ: 23/01/2022

"Kibubai agütsü aser Kibubai bener ao; Kibuba tenüng moajang." Yob 1: 21.

"Alima tesem ajungalen na ama nisung tajung aika lir. Taküm nung tetezü keta litetba aser nungdak ajak nung yarir aika lir. Onoki na atema mangyimer aser onok mulungjang nung na teti alitsü. Tsüngremi na moaja Pa kabu nung yuangma."

Onoki teti meima aliba asür I. Temjenkaba Longchar, pai iba akhümlü toktsür orr onok mangyim jashi nung alidang ana aser talang nungi kwinkakati ozü dang temeim sayuogo; nenok ajak dang kinüngertemi pelaba lemsateper. Iba ama timtem mapang nenoki kanga nungitta yariba ajanga onok mulung süneptsüogo. Nenok tsüngdong arua temeim sayuba aser mapa tajung agi nungitba den sarasadem nung methitemi yariba atema ozüi pelaba shisemer. Kanga pelar.

Temeim kinungtsü, chirnurtem, anük-apangtem, semchirtem aser kinüngertem.

KONANG TETUSHI AGÜTSÜR

Ungma Azüponger Tushin Semchir Dimapur rong nungi Wabong Bendagtemsü Longkumer Wb. Alemtemjen Lkr aser Asür Achila Jamitsür dena japaso. Pa wadang nung temelong lemteta

GOVERNOR COMMENDATION CERTIFICATE nguteta telongjem nem konang tetushi tulu bener arutsü nung nü nem asen telongjem-e tetushi tulu agutsür.

Tsüngremer leniba aser taochi nü den teti liang ma ta telongjem-e sarasademtsür.

Wapang Lkr
Secy., UATSTD

- OBALA -

Late P. Likumdi Imchen

Sür Küm 25 Abensaba Bilemteter

Aso: 1932 - Asü: 1997

Tsüngremer arishi anogo metongjungi nai onok toktsür orr tanü agi küm metsür Pungu abensar. Iba mapang tepiyong nai inyaka toktsüba mapa tajungtem angudang aser anepdang aonung shia nü sayubentsü bilemtetdang, ola matoki onok molungjang shia nung menungra-a bilemteter.

Na onok atema mangdang akaba Obala tajung ka! takotet tesayur tajung ka! aser tetemjen lenir tajung ka ama lia aruba onok molungjang nungi maitoktet.

Künü anogo asenok kotak nung ajuruteptsü teimla tulu nung onok molung anisüngzüka alir.

Temeim Kinungtsü, Chirnurtem,
Semchirtem, Anükapang.

Office of the
WATSÜ MUNG DANG

H.Q: MOKOKCHUNG, NAGALAND
Regd. EDS/GSS/70/84-85 Dd. 08-04-1986

KONANG TETUSHI AGÜTSÜR

1. Wb. T. SENKAAO, "Padma Shri Award" (Literature & Education) anguba.
2. Wt. TEMSUNARO AIER, IAS jenjang tongtetba.
3. Wt. OBANGLA JAMIR, IAS jenjang tongtetba.

Nenoki Naga nung aser talisa Aotsür/Aor nem tenüng tajung bener arutsüba asoshi ajak dang kanga pelar aser tenüngsang tulu agütsür. Maneni nenok wadang balala nung takok ngua inyaktetsü Tsüngremi moajangma.

Sd/-
Wt. S. Arenla Longkumer
Tir

Sd/-
Wt. Sungtireben
Tongti Zülür



OFFICE OF THE

AO SENDEN

"Kübur Asashi" (For the People)

TENÜNGSANG AGÜTSÜR

Ao senso sojasor Kenshioshi nung namasür Wb. T. Senka Ao, Kaketkeno zülü wadang balala nung takotet lungzük sütet nung, pa maparen dak sakloka India nung senpet tulutiba rongnung ka PADMA SHRI AWARD alangzükta asoshi Aor inti tenüng nung Ao Senden mendenti ajanga tenüngsang agütsür aser pa den tepelaba lemsateper.

Pa ajanga Ao Kin kaketkeno zülü nung tekong songtetdaksüa, pai koba senpet tulu ngutetogo iba asoshi nüma adanger. Tsüngremi maneni lenir wadang aser arishi talang moajang ta sarasademtsür.

Sd/-
Wb. CHUBAWATI LONGCHAR
President

Sd/-
(Wb. IMTIPOKYIM)
Gen. Secretary.

UNGMA YIMLANG LONGKUMER
TANUBO SEMCHIR AJANGA
PELABA SANGDONGER

Mr. Bendangtemsü Lkr S/o Alemtemjen Lkr Range Forest Department Kiphiri, Government-i nungloksüba ama meranga inyakba nung temulung süa 26th January India Republic day nung GOVERNOR COMMENDATION AWARD nguteta inyaktetba ya ajanga asen kin nema dangteta kangasa pelara ni ta alima dang sangdonger. Tsüngremi ne taküm aser kibong nübur tenzükba nung maneni moajangma ta asen kin sarasadem.

1. Aosungkum Tatar,
2. L. Talingangshi Tatar,
3. Likokazung GB

OFFICE OF THE

IAKHUNI SENSO MUNG DANG

Dist. Mokokchung, P.O. Mangkolemba, Nagaland

Date: 28/01/2022

Lakhuni Senso Mungdang 15th - 16th Feb. 2022 alitsü.

Anungji Lakhuni Senso Züngsem ajak absent mesüi arua atentsü metetdaksür.

President, L.S.M
S.Wati Langu

Secretary L.S.M
Mangko Walling

Thizama nung Azadi Ka Amrit Mahotsav sentong agiogo

Kohima, Aenjeti/January 28, 2022 (TYO): Brehostibarnü (27.01.2022) Thizama village council hall nung Ciephobozo block level indang Ibuba lokti senden den repsema Azadi Ka Amrit Mahotsav benjungmung sentong agia liasü, ta sangdong ka ajanga metetdaksü.

Iba sentong nung ADC Chiephobozou, Vekhoyi Chakhesang-i, shishilembaba inyakyim tajungba aser nübur takhangba (demand) timba akümtsü atema jenjang aketba product tem yanglutsü asoshi self-help groups (SHGs) ajungshia liasü.

Scheme balala indang jembiba mapang, Vekhoyi-i, yimtsüng nung sensakbo jenjang nung alirtem ajemdaksütsü aser tangar libaliro menepa alitsü

maongka agütsütsü NRLM nükjidong lir, ta ashi.

Iba sentong nung, CBLF member Rusoma, Neitsonuo Kera menden liasü. AC, SI/SD Chiephobozou, Neikiesanuo Z. Peseyie ajanga covid-19 vaccination indang tongtibangtem aser covid-19 dak sendakba teinyaktsü yimyatem telok dang metetdaksü.

Kasa sentong nung, Vizobei-i Theiino-i AGEY takok anguba indang otsü lemsatep. BDO cum BMM RD, Chiephobozou, Seyiekhrielie Rio-i, iba sentong indang tongmelang agi metetdaksü aser Arhenuo Pienyii-i ken ka aten. Iba sentong tembanga vice president CBLF, Neilhousieii Soliezou-i tepela anküp o jembi.

Kohima nung
'Fibre glass
composite gas
cylinder' saya

Kohima, Aenjeti/January 28, 2022 (TYO): M/S Seyie Gas Service, D. Block, Kohima nung Fibre glass composite gas cylinder saya liasü, ta sangdong ka ajanga metetdaksü.

Alakteta tejaoker, Deputy Director, Urban Development aser General Manager (Planning) Kohima Smart City Development Limited, Kezhochole Rhetso-i iba composite gas cylinder saya liasü aser Nagaland nung iba composite gas cylinder alir rongnung (first customer) Diana Mepfhuo mezüng kümogo.

Tanü, Kohima nung Composite Cylinder sayaba ya Nagaland nung mezüng asütsü.

Tang nüburtemi pei pei kidang tamshidak aliba steel cylinder dang nungi Fibre agi yangluba composite cylinder tem ya kanga agi tepungbaba aser amshitsü temela. Iba den külemi, fibre glass composite cylinder nung safety feature balala dena lir.

Iba composite gas cylinder sayaba sentong nung, Manager (LPG-S) Dimapur, H. Thangzaman-i ashiba agi, iba composite cylinder nung tajangzük aika lir.

Iba composite gas cylinder ya touzük seret 5 aser 10 nung angutsü. Tang, Nagaland nung pei pei kidang amshitsü atema iba gas cylinder seret 10 indang ayoktsü sentong lir.

Domestic non-subsidized category atema security deposit sen 3350 asütsü.

Customer temi pei kidang tamshidak aliba steel cylinder ya 'security deposit' agüja composite cylinder den melenteptsü akok.

Senior Plant Manager, Dimapur BP, Solei Kumrah-i ashiba agi, 'smart kitchen' atema Composite Cylinder ya cylinder tetemjen lir.

Indane composite cylinder nung shilem/takdang asem keta lir. Iba smart cylinder nung 'blow-molded' High-Density Polyethylene (HDPE) inner liner, polymer agi meyibangba fibre glass den HDPE outer jacket inokja yangluogo.

Steel cylinder tem dang nungi tawa tanü adokba composite cylinder tem ya lenmang aisü nung tajangzük lir aser steel cylinder dang nungi kanga tebungbaba asütsü.

Touzük seret 10 variant ya domestic non-subsidized category kübok ayoker aser touzük seret 5 variant ya domestic non-subsidized category kübok aser sale option balala ajanga free trade LPG (FTL) ama angutsü.

ALI AYOKTSÜ LIR

Nihokhu village (Foothill Road nungi 2 meter)
Sq. ft nung Rs 30
Contact: 8974869756 / 6909596955

Medongozo Kintso-i SASA U-16 wrestling kokogo



Kohima, Aenjeti/January 28, 2022 (TYO): Hokolbarnü, 60buba Southern Angami Sports Association (SASA) - Under-16 Naga wrestling title atema asaya liasü. Iba tetoktepa nung Kidima village nungi Medongozo Kintso-i takok nguogo, ta sangdong ka ajanga metetdaksü.

SASA - Under-16 Naga wrestling tetoktepa final bout nung iba tite koktettsü atema, Medongozo-i Visabu Yohshu (Kigwema village) tsükdaksü. Kasa tetoktepa nung Ruokuosetuo Tsochü (Mima village) aser Neisato Bei-o (Kigwema village) nati jenjang tasembuba aser pezübuba nung takok angu.

Takok angur pezüpronglai (1st, 2nd, 3rd, 4th) nem senpet 20,000, 15,000, 10,000 aser 5,000 angutsü. Ano, Under-16 Naga wrestling - quarter final nung tamakok angur ajak nem senpet 2,000 (Rs 2,000 each)

agütsütsü.

February 05, 2022 nü iba asayamung shibangba sentong nung parnoki item senpet agizüktsü.

Maneni, Hokolbarnü Indoor Stadium nung ayongba saisapong balala nung takok angurtem yamai alitsü:

* TABLE TENNIS:

- Women's Singles: Champion: Viphretuonuo Meze (Jakhama); Runners-up: Thejao Lüho (Khuzama)

- Women's Doubles: Champion: Vizünu & Rüküvonü Sothu (Viswema); Runners-up: Vakranuo Ngukha & Medovonuo Rhutsu (Mima)

- Men's Singles: Champion: Metevito Kintso (Kidima); Runners-up: Kevichüto Yohshü (Kigwema)

- Men's Doubles: Champion: Khrielie Zashümo & Thejanguzo Zashümo (Phesama); Runners-up:

Khrievi Thaprü & Unei Lüho (Khuzama)

* BADMINTON:

- Women's Singles: Champion: Abeino Neihu (Kigwema); Runners-up: Viravono Toso (Viswema)

- Men's Singles: Champion: Ayo Sakhrü (Kidima); Runners-up: Keneikhoto Yano (Kigwema)

- Women's Doubles: Champion: Viravonu Toso & Vilasanu Rhetso (Kigwema); Runners-up: Kekhriesino & Kelezono Kere

- Mixed Doubles: Champion: Neiseizo Yano & Abeino Neihu (Kigwema); Runners-up: Vil Pusa & Pulenu Neikha (Viswema)

- Men's Doubles: Champion: Ketoulezo Tacü & Chedeve Mejura (Phesama); Runners-up: Keneikhoto Yano & Zhazoto Sale (Kigwema).

Oting: Army-ia Amit Shah ama maittsü...

(Tapak 1 nungi...)

The Wire-i bushitetba osang ya Nagaland Additional Director General of Police (Law and Order) Sandeep Tamgadge den lemsatepa pa dang nungi osang tejangba metettsü merangogo saka pai kecha mashi.

"Onoki bushitetba osanggi okadak agütsütsü aser iba sülen public document ka akümtsü" ta Tamgadge-i langzü.

SIT-i Guwahati o Hyderabad nung aliba Central Forensic Science Laboratories nungi

forensic reports atar. Itemji anguba sülen kuli agütsürtem aser tai tonglokja alirtem den maneni ajurutepa kulitem agütsütsü akok, ta Tamgadge-isa ashi.

Iba lendong atalokli iba ken o ya Tizit police station ajanga ketdangsüa inyak saka SIT tenteta parnok nem mapa lezmüktsü. Tizit police station-i FIR benokba nung army-i Standard Operating Procedure nung lateta aliba ama masü local police guide ka manioc ta shia liasü.

Iba lendong atalokba sülen Nagaland chief minister Neiphiu Rio-i aniba sorkari Centre dang AFSPA agientsü atema shidi ka zülüogo.

Iba atema special assembly ka jazüka amendang Nagaland nungi AFSPA agientsü bangjemtepogo.

Tesüiba küm ishika Nagaland sorkari ita trok shia Centre dang AFSPA agientsü atema shidi zülüogo saka Centre-i ibaji magizüker, ta sorkar ketdangsür kati ashi.

COVID-19 pandemic mapang...

(Tapak 2 nungi...)

Iba sentong nung Nagaland Rural Bank chairman, V V Narayana; SLBC Coordinator Alpha Pou; Additional Secretary, Agriculture, Sachin Jaiswal; Entrepreneurs Association CEO Neichute Doulo; North East Initiative Development Agency programme office, Nagato Aye; Chakhesang Women Welfare Society executive director, Nezelu Nyekhe nung temia jembia liasü.

Iba sentong nung NABARD Nagaland ajanga telok balala nem mezüngbuba aser tanabuba jenjang nguteter

nem senpet sen 10,000 aser 6,000 agüja liasü:

Top performing SHG in the state

1st: Ayongben SHG under Nagaland State Cooperative Bank, Chumukedima Branch
2nd: Krovitho SHG under Nagaland Rural Bank, Purana Bazar Branch

Top performing JLG in the state

1st: Seyie JLG under Nagaland State Cooperative Bank, Chumukedima Branch
2nd: Krolie Krotho JLG under Nagaland State Cooperative Bank,

Chumukedima Branch

Top Bank branch in saving/credit linkage of SHGs

1st: Nagaland State Cooperative Bank, Dimapur Main Branch
2nd: Nagaland State Cooperative Bank, Chumukedima Branch

Top bank Branch in Credit Linkage of JLGs

1st: Nagaland State Cooperative Bank, Dimapur Main Branch
2nd: Nagaland State Cooperative Bank, Kohima Main Branch.

Women's Asia Cup 2022: India-i bronze medal angu

Muscat, Aenjeti/January 28, 2022 (Agencies): Hokolbarnü, Hockey Women's Asia Cup 2022 - third-place play-off nung, China aser taoba asayamung takok angur India team asaya liasü. Iba asaya nung India-i goal 2-0 agi China tsükdakja bronze medal nguogo.

Sultan Qaboos Sports Complex, Muscat nung telok ana tsüngda 'third place' atema asayaba mapang, Sharmila Devi (13) aser Gurjit Kaur (19) nati India atema goal ka ka idaktsü.

Gurjit, shibai taoba küm India team Tokyo Olympics

semifinal tongtettsü asoshi tongti shilem agi, la teyari ajanga Devi aser Kaur nati goal anaprongla idakja liasü. Hockey Women's Asia Cup 2022 asayamung tetenzüklen, India tetsür team-i goal 9-0 agi Malaysia tsükdaktsüba sülen, semifinal atema qualify asütsü asoshi Singapore madak goal 9-1 agi takok mangudang, parnoki goal 0-2 agi Asian Games champions Japan makok.

Ajisüaka, semifinal nung India team defence tsütsü tashi maitba aser penalty corner maongka magitetba yong, Korea team-i 3-2 agi India tsükdaktsü.

Honduras tir inyaktsü... (Tapak 8 nungi...)

Saka Castro'er Libre Party nungi ozüng yanglurtemi Castro-i shimba masü saka par legislative party indang tir asütsü Hokolbarnü nisung ka nungtet, shiba la indang vice president-i yaritsü molunga lir. Telok katia atsüanem maka, anungji Mongulbarnü legislative senden amentsü lir.

Right-wing Tir Juan Orlando Hernandez nungi Castro-i tir menden ya melenzüker aser lai Honduras nung anti-corruption mission ka amenoktsü atema United Nations jaoktsü sentong lir, ta ashi.

US court tem nung

Hernandez anema ochimashi mapa inyakba aser temesepba mozü shibelenba ken o benoka lir, saka pai item mapa meinyak, ta ashir. Taoba küm US judge kati pa adianu ka temesepba mozü shibelenba mechi takum tepiyong aser ano küm 30 tepuokdak ayutsü obendang agütsü.

Castro ya asemben tashi tir atema toktepa mapang November election nung takok angu. Taoba mapang la kinungbu Manuel Zelaya tir inyakdang la ya first lady liasü, saka 2009 küm mitkar tashi amshia iba sorkar atsüngdoka liasü.

Russia-i taruba ita Ukraine... (Tapak 8 nungi...)

Parnok jembishinüba mapang tarutsü nung Russia-i Ukraine amaknungbo telangzüba agütsütsü atema United States aser tembar linüktem renema alitsü atema Tir Biden-i nenshia ashi, ta White House sangdong ajanga ashi.

Zelensky-ia tawa tensa jungdaksütsü merangba indang jemi aser tarutsü nung lungjemer inyaktsü pangjemtep, ta ashi.

Hokolbarnü France Tir Emmanuel Macron-i telephone ajanga Russia Tir Vladimir Putin den jembitsü lir.

Russia-i Ukraine ya amaknungbo, ibai tang mezüngbuba masütsü. Russia-i Ukraine indang southern Crimea peninsula ya 2014 küm rakzüka liasü. Russia yagi ano Ukraine sorkar anemba telok ya yarir, shirnoki eastern Donbas region nung tesem

tuluka amokbanga lir aser iba rara nung nisung 14,000 shi süogo.

Russia yagi Ukraine amaknungbo Western Europe leni yokba Russian gas indang pipeline lapoktsü aliba soita yutsütsü, ta US-i Bresthostibarnü amokmerena liasü.

Nord Stream 2 ya Russia nungi Germany tashi aotsü lir, aser Russia-i Ukraine amaknungbo iba project nung tenokdangba agütsütsü, ta Berlin nung aliba ketdangsürtemi Bresthostibarnü ashi.

Western allies temi Russia indang rongsenketzüng nung tenük yoktsü, ta ashir.

Kilometre 1,225 talang pipeline ya küm pungo agia sen billion \$11 indoka yangluba lir. Iba pipeline ya Baltic Sea telung nung aotsü, koba Russia indang gas Germany dang ayoktsü asoshi yangluba lir.

BILEMDANGANG

"Azü pela pelabaji mapang tatsüka dang."